

PARDO BAZÁN, CASARES E A CIENCIA

BERMEJO, Manuel R.
GONZÁLEZ-NOYA, Ana M.
MANEIRO, Marcelino

*Departamento de Química Inorgánica
Universidade de Santiago de Compostela*

No XXV Congreso de ENCIGA presentamos unha ponencia con título “Antonio Casares vs. Emilia Pardo Bazán: Literatura e Química”, para celebrar o Bicentenario do nacemento de Casares. Cremos, que sería interesante volver sobre dita ponencia dado que, este ano, estamos a celebrar os 125 anos do pasamento de D. Antonio Casares. Coidamos de interese volver sobre este tema cunha dupla intención: 1º, analizar e completar a impronta que a vida e a obra de Casares deixou, e está a deixar, na literatura galega e española; e 2º, como acadou, Dona Emilia, o amplo coñecemento científico que tiña, que a levou a ser unha pioneira do que sería a literatura de anticipación científica.

Nesta comunicación tentaremos estudar máis a figura de Emilia Pardo Bazán en relación cos contactos que tivo con figuras sobranceiras da Ciencia galega da época –Casares, González Linares, Calderón Arana, Rodríguez Carracido, Rodríguez Mourelo, Casares Gil,...etc–, así como as influencias de todos eles sobre a súa decisión de formarse cientificamente; este impacto sería tan notable que, para sempre, ficaría ligada á Ciencia preocupándose de aprender cada vez máis. Aínda que a figura de D. Antonio Casares foi dabondo estudada ao longo do pasado ano non por elo deixará de ser estudada no futuro e, como non podía ser doutro xeito, a súa figura poliédrica, cos seus claros e escuros, ficará presente nesta comunicación, tanto pola súa vida como pola súa obra científica e, como non, pola súa traxectoria social.

Nesta comunicación pretendemos afondar na presenza de Casares na Literatura, completando canta información se foi aportando o pasado ano, de modo que comprendamos mellor a tremenda impronta que o seu legado deixou para as novas e futuras xeracións.

Ao mesmo tempo queremos completar a comunicación que presentamos o pasado ano, aportando novas achegas sobre como foi a relación de Dona Emilia Pardo Bazán con D. Antonio Casares, incluiremos novas informacións sobre: a relación da familia Casares coa sociedade coruñesa da época; como se incorporou, D. Antonio, ás actividades das elites ilustradas e liberais; como se chegou a establecer a relación da nena Emilia Pardo cos fillos e netos de D. Antonio; como chegou Dona Emilia Pardo a relacionarse cos profesores e alumnos progresistas da Universidade de Santiago de Compostela dos anos 1870-75;...etc.

O noso obxectivo, nas comunicacións que presentamos en ENCIGA, segue a ser *Informar, Educar e Divertir*. Confiamos en que, unha vez máis, as nosas comunicacións coas ideas que presentamos poidan ser de interese para cantos nos últimos anos nos seguides e as podades utilizar nas vosas aulas co voso alumnado.



Emilia Pardo Bazán